

## De Neianfang noh de Enteignung

Erzählt von Josef Titsch/Vaihingen, Januar 2007

Noh am zwati Weltkriech han se unser Leit, alles weggholl. Es Feld un alles mit dem se des Feld vearweit han Sowie die Pherd Kih un Schwein. Ihre Heiser han se aa vestaatlicht. Am Wagner Josef sei Dampfmühl han se abmontiert un fartgfiehart. Angeblich han se die Mählsteene net mitholle kenne. Ob se mit dere Mühl Frucht mahle han kenne, waaß ich net. Ner die Männer die im Kriech net mit Deitschland geche die Russe gekämpft han ware berechticht 8 Joch Feld zu bhalle, odde han bis zu 8 Joch dezu kriet die kinner denne, ihre Vater im Kriech war un net geche die Russe gekämpft hat, han Recht uf sovill Feld ghat. Weil bei de meishti aa die Motter in Russland in de Kohlegruwe ums Lewe kumm ware, han ihre Großeltre des Feld vearweit. Bis se gern odde ungern in die Kollektiv eingetret sin. Weil die meishti Deitschi nimmer ghat han wu ihre Brot zu vediene han sich die Männer wie aa weiwer Arweit gsucht un angholl was se gfun han. Aach Weiwer han bei de Maurer garweit, iwerhauptscht solchi, denne ihre Männer ausm Kriech nimmer haam kumm sin. Vill han sich Bizikle kaaft un sin jede Tach in die Arweit gfahr. Bei jedem Wetter ob Reje, Schnee odde Eis un sin gar zu fuß gang. Die jenichi die ka Arweit in de Nächstend gfunn han, sin die ganzi Wuch fart geblieb un ner iwer de Sunntach zu ihre Familie haam kumm. In de erschi Jahre hat die C.F.R.(Rumänischi Eise-Bahn) uf unsem Hotar Flachs angebaut. Ihre Kanzlei war beim Zauner Johann Hausnummer 125 (die Familie die aa iwer Nacht uf Deva han misse). Gedrescht han se den Flachs bei de Becker Elisabeth Hausnummer 279 in de Scheier un de Some uf ihre Hausbodem. Die Deitschi Buwe aus unsem Darf die dart garweit han ware aani vun de beschti Fotballmannschafte, die unser Darf noh am zwati Weltkriech ghat hat. Schun noh paar Jahr hat sich des Unternehme ufgleest. Un die Sovrom hat ihre Kanzlei in dem Haus eingricht. Bei dere russisch-rumänischi Firma die im ganzi Land Abteilunge ghat hat, han wennich Leit aus unsem Darf garweit. Die han Feld in Richtung Schendarf ghat un dart unne in de Insl han se Schwein gmäscht. Ner paar Jahr lang hats des Unternehme gin. Wie se die Kollektiv gegrind han, han die Familie Becker Elisabeth Hausnummer 279, Jost Michael 199 Maurer Ignatz 200 un Klein Nikolaus 224 aus ihre Heiser raus misse. Die meishti Deitschi awer aus unsem Darf han bei de Firma (Landwirtschaftlicher Staats-Betrieb) ihre Brot vedient. Die war in die Heiser eingezoo aus denne die anri Leit uf Deva han misse. Des ware de Grof Porcea Ludwig un die Familie Kapp(Theiße Traudi H.N.48), sowie des Gebeide wu die Mühl drinn war. Außerdem han aa noch die Familie Kapp(Rosche Sepp H.N.101) un die anri Familie Kapp(Theiße Hans H.N.103) aus ihre Heiser raus misse. Die Weingärten unne unsem Darf han se rausgstockt, var am Maraschtberch a Barackn ufgstellt. Un des Feld unne unsem Darf, sowie des in de Insl far die Gärtnerei hergricht. Sie han Kanäl gebaut, die ware net wie geweehnlieh in de Erd, die ware wie a Damm um sich geche Iwerschwemmunge zu schitze, wie z.B.der in Glogewitz. Mit dem Unneschied, dass in de Mitt vun dem Kanal a Grawe war in dem ises Wasser gloff, des wu se aus de Marascht rausgepumpt han. Varne wus Wasser neinkumm is ware die Kanäl hoch un hinnenaus immer nidriche, so dass's Wasser laafe hat kenne. Jeder Hauptkanal hat uf alli zwaa Seite Newekanäl ghat.

In die han se's Wasser neinlaafe glosst, wann die Netzer es Gemiese gnetzt han. De Patroul war der Mann, der de ganze Tach mit de Hack uf de Schulter uflm Kanal vun aam End bis ans anri gang is un owacht gin hat dass es Wasser net ausbrecht. Wann e die klani Lecher net glei zugmacht hät, vun denne Wasser raus gloff is, wär immer mehr Grund rausgeschwemmt gin uns ganzi Wasser hät dart rauslaafe kenne. In de erschi Jahre ware außer Deitschi arich wennich anri Nazione bei de Firma angestellt. Wie die Arweit mol richtig gloff is, han vill Leit aus unsem Darf ihre anri Arweit ufginn un sin zu de Firma kumm. De Direktor war a Ungar. Wann ich mich richtig erinnre kann hat e Biro ghaaft. Der hat noch ka Auto mit Schoffeer ghat, so wie die in de späteri Jahre. Er is selwescht mit aaner Scharetta gfahr. Des war a zwaarädricchi Kules far zwaa Persone un is vun aam Pherd gezoo gin. Er hat die Peitsch in de Hand ghat un is ner so durch die Gegend gjackert. Bei Rosche, im Haus Nr. 101 hat e gwohnt. Die Brigadiere in de Gärtnerei ware de Dittiger Andreas, Maier Josef (aus Nikloos) die Titsch Anna, Klemm Anna un Fritz Elisabeth. Sie han die Arweit eingetaalt un die Gruppenfiehler han die Leit punktiert. Es meishti Gemiese han se damols noch mit wäe gfiehart. Aus Deitschsanktpeter ware Buwe als Kutscher kumm. Vun denne han vieri Madle aus unsem Darf un aaner a Madl aus Wiesenhaid gheirat. Es han nämlich vill Wiesenhaider in de Gärtnerei garweit. Ner aus Arad war a Laschtauto, Gemiese holle kumm. Unne aam Baam newe'm Fahrwech han se die Kische hingstellt. Beim Umkehre is der Schoffeer immer iwe' s Feld gfahr un hat die Balke uf denne die Planze in de Bettle gsetzt ware kaputt gmacht. Des hat denne zwaa Buwe die sich dart beim Netze abgewechselt han gar net gfall. Weil se jedsmol wann se dart gnetzt han, alles herrichte han misse bevar se anfangen han kenne. So dass der Bu ders erscht dart gnetzt hat, wie se Kische unne den Baam gstellt han, vill Wasser in die Raje neinlaafe glosst hat wu der Schoffeer driwe gfahr is. So dass de Auto steche geblieb is, wie e dart nein gfahr is. Wann anri Leit ehm net gholft hätte, den Auto rausschiewe hät er lang dart stehe kenne. Un zeit domols is e nimmer iwer des Feld gfahr. Später wie unser Firma an die Glogewitzer angschloß is gin han se a Plätt gebrung un die Leit sowie Wäe iwer die Marascht gfiehart. Es ware aa Jahre in denne sin se mit de Scharetta zwerch durch die Marascht gfahr. Sie han a Platz rausgfunn ghat wu's Wasser net so tief war. In der Großkultur wu se Frucht, Kukuruz un anres Getreide angebaut han, han se alles mit Traktore un anri Maschine vearweit. In de Weingärten die noch ufm Wiesenhaider Hottar geblieb ware, war de Dukarm Anton Brigadier un dart han meischtens Wiesenhaider garweit. Wie die Deitschi noh mehreri Jahre ihre Heiser zuruck kriet han, han die jenichi die in Deva ware sowie die Familie Kapp, Hausnummer 101 un die Familie Becker nimmer in ihre Heiser einziehe kenne.